

Enga Tuskoni

enga tuskoli tanynyafijinnan. sikkala kamin ooy weekka elsan kam daammuunini. tellatoon weeyi in kam goshkooya iigon. weekkoni jarbaanagoon gena iyyon. tuskuttikkon jelew tangon muttaada iyyon. tanynyafijintaan id asliin kamin kooga sikkal tiiroossan. issigjon: kam weekka sikkal tiirsoo? jelew tan muttaadaa? eyyo. goshkooyaa? eyyo. jarbaanaa? eyyo. nalaammunne issan. banynyon woon urmi kam anga tafaassiillog banynyiroo, nalaamunne iigloo? issaatta ay ukka juu sultaanna fa shekkijir. juu shekkij. kadda kaagintaan sultaandogo. sultaan, hooy man jemaanchii kam anga tafaassiillog aa banynyinnan nassoo ikkeeggoon nalaamunne innan. sultaan banynyon: hee wildii in kamikka ur nassoo? la la la nalaamun. jelew tangon muttaada goshkoyagoon genin jarbaanagoon genin walaa nalaamun. woon hikkir irbeelo uri? uu fennilog ekkachchis. iigatiron halaas in jemanchii fennilog ekkachchise iiginnanaani kutta juu kam inga kaar. tannas shebbaaklog naaffa menja aag ukkeentaangoon woo aabba iyyon tar hokm in zulma. isuun teron fennilog ekkachchaakkani haaja weekka ayiin kir jeeb in idrookkeeg fennilog ekkachchana mengir. tellee fennilog ettaachchinna, tar idli kam tanga kaaraan, tellee fennilog ekkachchimunna, kamikka teriin idissiin kullatoon idta arratiddiinnana iyyon. tayyib iyyon. juwagoon rummaan weekka mindiil weella kantoosa ilba weel idir koffoosa kir taffaabba jeebil idroottiron. asuun inga fennilog ekkachchana iyyon. weeyi liffafiina iyyon. weekkon mukebbeba iyyon tuskuttikkon mulefefa mukebbeba hittat rummaan iyyon. jeebiltoon ooseda kachchikangoon ilba koffafiin ilbag galleda juukangoon mindiil log kantafin, mindiilka feeyeda juukangoon rummaan wee daaffin. iigatissan inguu fennilog ettaashshanaan yalla juu kamr inga kaar. iidirooson. kiragoon in wilid tuskongaarka ashaa tennig tiroochcha ooda weella koffoochcha gafiir wekka shaaddo noogin agilla menjirootchchon. tella wee banynyon: aademille tiin suu ungngranga wallafii santee weekka neechchimeenii? uwuttikkon banynyon: aademille kattin tood tanneenga faga jaddafii weennaan arij kaashafii sahan weekka kabjimeenii? dawwinkeel tennikkon banynyon: aademille sultaan asiddan beyyitoommeenii? gafiirikkon juu iigatiron ingir ingir banynyisanaya. kulli waahedta tariin banynyisiing aawirtirana iyyon. ooda wee ooda weella iskiroochchisan baay baayachcha. kulli waahedta tariin banynyisiinga tiirooson wallokkilog jemmitoochchagoon gafiirri issigjon: suu inni hikkalaga meno? suu anni tar yaa ayiin banynyisiina menonaa, minna juukangoon tanneen gorka unnoosa kutta menjinnanga moonon alli tabbiga niishi uwwon fakkil ushredaagsan, suu kedekka mermerafiyon. manga issigsan katti inni hikkalaga meno? katti tar yaa nadiifanga karjafiyonaa kedekka mugriin gattiga dukkinon minna juukangoon tanneen takka unnisiin hiinna mugilla agjisana iyyon. in

buruunig issigsangoon banynyon: buruulle yaa ashriya menonaa tabdiin gatti dukkinenon. gafiirikkon juu sultaanga ingir ingir haslafiinay iigjatiron. sultaangon tiig unnikirokka taachch ekkir issigon in tiin unnisiinna ir hikkiroo? banynyon: tiil unnoosa kutta menjinnanga moonosoni, allig tabbiga niishii uwwon fakkil ushissiiga kutta menjon. tayyib iyyon. urtig iijikka taachchon, eged filaannaanne wilidta unnisiinna ir hikkiroo iyyon. banynyon urtirii wiirriddo menjinnan egedl unnoosa, beekkintaan urtiriidog mira nogoni, kattin agka orkijaannaya, mug ayga erga kaagin mugilla agjis. tayyib iyyon. ideen tanga jorkirongoon banynyon ayl irbimmun inna ikkanii walla tabdina ikkani. man kattig talabokko suug talabokkoon faayroochchon. tannaska talabokkoon maanyin kumbuu uwwongaarka dukkijechchatira tannaska edkirooson. daab faar weekkoon tiroochchon. shaharka oomrekkiroon tood weekka unnooson. toodikkon keyya keyyagoon bootoorangooson. angatood iyyon, juu tawwo arki sibeeltoonni eddi innin eska kechche weekka kechcheda kire iyyon. aman gaarrottoon juu kechcha arratiron. gufaadakir gonyoosagoon juu mashalla iskiroose iyyon. iskiroosongoon sammoooson. angatood iyyon juwa inga innuun murtila abbire iyyon. tella ooy tanninnaan indan kikkeka innuug ikka jaanoottirey fedde iyyon, murtin duwwin gebiih weellagoon fa kikkinaani. sokkeda juu tannuun murtil abbirintaan juwongoon in taffaabin banynyisiin murtil kikkooson. annuu iyyon ayga in murtitootta jaanooddeene iyyon. ukkuu ibooguun arhamal gojafiyaam juu hussan weegeda noge iyyon fa jaanatimmunneeni. weegedon. aabba iyyon hooy iigon, annuul ayga murti iriin banynyisiinga jaanooddeene issiig weegooddeena iyyon. halaas kudeeterekka idroottire iyyon. kudeeg idroosagoon geshshig bishshaten murtin komboo shebaabangeffaani. iigatiron: angatood, tar murti inga echchuu ebettee giraat uwwog dukka murtiin uttila, jebelikko baharikkon fakkil foogja murtiig iijinnaannee wilid kikkan fentig fa doolin fentin baalanga ikkon murti inga obolin tawwo naaffir menjiredaaga murtilog warkireda obolin tawwolog mira taar. ingirgoon yoom tuskog dummechchon. iigatiron angatood murtil inni juntangoosonaani taani echchuutam. kudee tanga washshi kinynyakir mashan masmassee kinynyakir jondookir kudee tanga idirtire iyyon. takkon taffaabin banynyisiin muujbil kudeeg idrooson. murtikkon ondi weekka unnooson. aabba iyyon murti annili murtin ondi weekka unnooson. iigatiron tar dawwikka mugoosa kuduudta doolatir. doolatir doolatir keyya dawwi weerakiroosa aabba murti anni dawwi weerangoosona iyyon. angatood ikka innuu dummetteenaani, awan gitta menjikan awar awakka mooge iyyon. takkon murtig awar awakka mooga awar awakka mooga karjirooson. aabba iyyon hooy iyyon murti mooga karjoosona iyyon. iigatiron isuun ayga dokka guunya, ikka dokka guunyle iyyon. isuun ayga ashirroodakir guunye iyyon, ikka ashirroodakir guunyle iyyon. annenga ayga alag uwwogoon faayrokka in maanyii

anguugoon dukkijokka iron duunyan konyil elaakkokkan fa minga aawoo iyyon. gelebalog ur tanga fa sokkise iyyon. innuullina iyyon. gemin hawillagoon karaama weekka innuu kunin, wallo dibikkon karaama tannin. juu seefkoon talab degerkoon talab hizaamgoon talab, tariinnaanee kir shaaddo fershija tiigookkani ardalka ardinnan, iigatir aygon fa karaama innin dib ardireeni ayga deeney dummechcha aag ardintaan innuun gumurka sokkeda ikko doohiki ingollin tariin baatta. juwagoon iigatiron: wallo dib karaama innin, degerkoon den hizaamgoon den seefkoon den ay fa wildii ardalka ardikkuuddan murti anni jediidta doogeda aygon fa ardireeni. dooljatiron. juu murti tanna degerka okkir hizaam tanga moora baadee tanga sokka seef tanga sokkechcha okkagoon orrekingoon wildiiddan keemsin kallekingoon aag keemsa kir tabbiy tannuun gumurka mereda kir taffaab erdifeda daffon. aademiriikkon sultaanga diisil kiddafiin ela kulli waahed jenbi tannog mira dooga abaak tanna torjechchisan. angatood asuun abaakka wiida guunye iyyon. aabba iyyon, murtii geel weekkuu jirrafiijinnan. kada geelka dumme iyyon. kiragoon kada geellog tanynyooshshan. angatood usuun abaakka wiida guunye iyyon. aabba yon, kamrii weekkuu jirrafiijinnan. siiwga dumme iyyon. siiwlog takko tangakko kuttafiijinnan. angatood asuun abaakka wiida guunye iyyon. aabba iyyon, murtin ondi urum weeyi uug jirrochchon. iigon: iniin taffaabillinaani in lijaamga kogorakir tokka dummeda, baadeeg erjimahir, tar uug fa duwwijnaani. kada urumgoon dimme iyyon. kada urumlog waayafiijinnan. juukangooni, noorri koon tannatoon jebelikko baharikkon fakkil farki amannog tobbafii weekka aawedaagin. murti tennikkon juu manga tilakkiy warechcha dachch iyyon. aabba murti uuni korjijona iyyon laala iyyon tanneen takka junta messiinna mashan dinaar kuduudtere tanneen tuun kochchil okkafiyon. eleelan karaakkonaan erjimahir. manguukkun kir man farkig waredeeg meskissan. kiragoon maniin keellottoon wiidooshshan. takko tangatoodikko doogagoon mediina weella juusan. iigatiron: angatoo, iniin baadta uug fa duwwijmunnaani kutt in murtig eda innog keera juukani suugka fa elname. milyoon jeniig ikka idirtikkagoon laala mengir. id feekkee kiid, surra sokkii hussan tanynyafiillon ikka noorri iddo baarka ayga takka deenoose ikkan tiroosa tariin ikka tirekka ayga dumm arraden. suugil eda juwagoon shongirroog jaaninnanga moonnoosa in taffaabin banynyisiin feekke kiid dibdiib foog surra sokkiiteredi noorr iddo baarka ayga takka deenoose iyyon tirooson. mangon surra weekka kaagintaan tirooson takkon kaagintaan taffaabba aawroottiron. man gufaad teriin ken murtiin ooyga abbirsiingon kimnee tennil daaffin. surrag kuseda juukangoon habad weekkuura. tar habadtuunyig shokka shokka gufaadil idachcha iigterekka urr idroottira. idli jaabir yaa jebra'iil iigintaan konyil tiirkiron maany tanni fidikki fidikki fidikkiy gallijatiron. yalla woo angatood kabar unga doola kabintaan fa tanynyirooni iigoosa takkoo tangakkoli manna tiigjisan.